

四庫全書

集部

欽定四庫全書

集部

存家詩稿卷五

四

詳校官監察御史臣徐如澍

侍讀臣孫球覆勘

總校官編修臣王燕緒

校對官編修臣朱依魯

謄錄監生臣陳維宗

欽定四庫全書

存家詩稿卷四

明 楊巍 撰

七言古

秋日送呂二山入南遊兼寄青州陳同年芝巘
秋風颯颯吹客衣聞子明朝又南發回首應瞻燕塞雲
與誰共醉齊門月齊門烟月不勝秋詩句如珠何處投
感時可弔由文里懷土休登海上樓君家空樓渺何處

越嶠鄞江歲云暮滿眼干戈歸不得逢人猶索空樓賦
身自飄零心自閒幾時重出穆陵關若遇青州陳伯玉
為言憔悴欲歸山

送呂山人往邯鄲謁呂祖祠

我讀枕中記已厭邯鄲塵君去訪靈跡復臨漳水濱漳
水西來幾百里長途日晚紅塵起行人只解問黃梁不
悟盧生今亦死舊日叢臺今若何滄海桑田變已多名
利馳驅人易老白頭猶向祠前過祠內真君是阿祖清

宵應得夢中語落落區寰吾與汝終南太白在何處玄
關消息肯相傳與君去去學長年

夏日讀呂山人甲子稿

靈雨初過暑氣徂殘虹半落青天隅誰人探得驪龍珠
山精海怪來相呼十二樓臺爭獻圖蛟螭潛泣愁水枯
白晝夢狎昆侖奴野鬼捫舌撼戶樞醉拋瑤杵碎冰壺
松風颯颯寒人膚童子汲井鳴轆轤狂夫消渴一旦無

啄木吟

嘉靖年
中作

啄木鳥五花色朝飛城南暮飛城北老樹無蟲啄風葉
徒惻惻鳥以蟲為餌蟲在樹心裏雨注風刮樹欲死明
年何處哺其子爾不見首陽山中蟬吸露向風烟又不
見延陵江上鴈啄稻在平田只今樹木高於天吁嗟啄
木鳥爾心胡不然

和呂山人戲作病足病腹歌

嗟我方病足君何亦病腹狂來還飲幾斗酒行時須仗
一竿竹我足經旬不出門昨宵猶夢向王屋鞭笞雷霆

開道路唱叱鸞鶴同奴僕君腹幾日不能食就中空濶
多所畜已飲仙家之玉液更得佛氏之金粟拉君共上
崑崙居餐霞馭風心何如

天生黍歌

有序

甲子春余以病歸田里余在任無能蒙聖天子
兩賜金幣因買田百畝在桃花嶺之南北擇其
腴者種瓜與木綿仍餘田三十畝一夕黍苗徧
生夫農夫勞勞播植耕耨尚有無禾之歎今不

假人為多而且茂非天與耶
呂山人適至謂余曰
公貧好飲天資之以釀酒耳
山人與喻明府俱作七言長篇余和之

吾皇聖德一何深
小臣兩次受兼金
買田百畝連滄海
結宇三間傍翠岑
耕鑿自擬他日事
驅馳欲盡平生心
自從得病放田里
伏枕三年今始起
為農轉覺帝力多
踈懶其如衆口何
不乘款段澤中去
長荷鋤犁嶺上過
可喜今逢大有年
官家為政若烹鮮
柴門不見里胥到

野老惟聞日晏眠夜來新得滿犁雨南畝有禾深幾許
初聞木綿齊發花更報荒田皆生柎頻年赤地愁無禾
誰能不播苗盡吐人力雖勤未必然始知造化功為巨
清貧已得真宰憐酒錢不苦無人與時當伏臘可作案
客若遠來亦堪茹里中貧者無其數落穗任教村僮取
感應由來仰至尊秋成定然酒滿盆醉祝吾皇億萬壽
以報天高地厚恩

和呂二山人病酒作

君來不獨為消暑河朔風流自今古解囊時出海嶽圖
對人不作寒暄語平生嗜酒苦無錢願我買田多種黍
年年五月訪我來紅葵白葵滿樹開不須更作驚人句
且向花前傾酒杯

題萬松圖謝客惠雙栢樹

感君惠我二栢樹為君試寫萬松圖醉中落筆無遠近
醒後看之亦扶疎夢入天台第幾峯千巖萬壑盡蒼松
晴宵白晝作風雨屈枝老幹蟠虬龍聞道此中堪避世

服松餐栢固元氣祇因軒冕誤長生佳樹移來想高致
野人家在滄海濶頓令蓬戶羅清陰病來已棄大夫職
老去能參般若心吁嗟乎得此二栢樹何啻雙南金

和呂山人醉蝶吟

有序

嘉靖乙丑秋七月四日辰刻余與呂山人對酌
有蛺蝶自北牖入向山人若舞若慕又若語吸
山人杯中猶灑餘瀝於几間從前門飛去一低
一昂有醉客態昔莊周夢蝶栩栩然猶以為異

著在南華傳諸千載若此蝶者直吸杯中可謂
物我一體矣非山人抱林壑之姿帶烟霞之氣
不能有此山人詩成余和之紀一時之勝耳

小圃開樽七月初
蛺蝶飛來如相呼
狂客當筵笑拍掌
五色翩翩下復上
一吸杯中真有神
平頭奴子却生嗔
徘徊宛轉不欲去
似戀雲林最深處
或是劉伶所化歟
不然嗜酒何同予
萬事無如一醉好
滕王莊叟兩蘧蘧

行路難二首

嘉靖年
中作

奉君琉璃盃酌君琥珀酒聽我高歌行路難使君悲歡
兩無有君不見瞿塘水險天下無扁舟夜過捷吹噓蠶
叢鳥道削如壁駑駘經行百無失王良能諳六馬情十
二衢中似鏡平不知一旦生轆軻驚車輻折馬盡驚吁
嗟世事難自料或有鬼神司權衡儀秦口辯周張吃逢
時皆可取公卿勸君酒君莫辭富貴榮華自有時

君不見邯鄲道上屠狗兒縱博不知歲月馳買酒放歌
人不齒一言許諾輕生死又不見長安城中車馬客揖

讓宛若稷與契一朝得君固權寵回視同袍生胡越胡
越南北路不通乃今共舟復同籍眼前浪起不相容遂
覺茫茫天地窄我歌行路難使君心無歡寥寥古道幾
時還願隨四老卧商山白首茹芝無禍患

春夕飲紀山宅醉後觀火花歌用杜韻

畫舫齋中夜清興主人乃是詞林長燈前愛舞欲纏頭
座上呼尊自拍掌晉苑梨花開尚遲蘇家火樹今重賞
此時天女墮金花此時東皇簇玉仗恍惚如臨蜃氣樓

依稀似倚璇題榜
蜃樓璇榜條然開
千光萬焰雲霄上
文采風流聚一時
眼中榮辱那堪悲
况逢盛世心無事
醉死花前不復辭
南方露布初聞捷
北極朝廷更喜慈
須臾花盡忘歸去
把酒還歌芳樹詩

贈田三得孫

昔年我醉水西村
君尚無鬚初冠婚
今年我卧桃花嶺
聞君有子復有孫
問君行年四十幾
壯歲得孫歡莫比
芝蘭滿庭從此始
人間萬事浮雲耳
厨中有酒且有雞

荆樹春來枝葉齊，君應終日醉如泥。
呼兒把盞聽孫啼。

題許參戎風木卷

鴈峯南下蒼茫樹，舊是阿翁棲隱處。
落日猶懸雙竹扉，英魂不返泉臺路。
幽思無端結暮雲，秋山猿鶴叫孤墳。
將軍莫向西風哭，赤葉蕭蕭誰忍聞。

海日篇壽路蓮浦兵憲

隱隱扶桑樹，迢迢芙蓉城。
陽谷萬丈底，相傳日所生。
我遊泰山登日觀，俯看溟渤精靈變。
桃花谷口雞未啼，沃

焦石邊吐已半火輪閃爍蓬萊宮十二樓臺元氣中蛟
螭深藏海若泣倏忽乾坤萬象同海上仙人安期子平
生變化亦如此餐霞日坐阜鄉亭跨竊時過之呆水皇
心惻隱世間人命汝執符作帝臣彤墀侍日月紫塞掃
風塵風塵已淨鴈門道日月猶光諫疏草本是漢家太
乙精今為宋代龍圖老只今甲子無人知紅顏綠鬢映
長眉姓名已記御屏上回首三山空復思君不見海日
升沉今亘古君之勛名與日伍

贈華谷子歌

華谷子昔年相遇北渚亭買酒放船西湖裏湖光潏灩
八月秋殘荷猶香暮山紫醉來走馬向西街個儻風流
誰可似舊遊回首水滔滔海上重逢興不豪我向天涯
甘老矣如何爾鬢亦刁騷君有長才不得售仰視雲霄
空唾手劉蕡上書君門遙張儀還家舌在否黃金赤紱
盡浮雲不如花下一杯酒請君且莫歎蹉跎來日已少
去日多天上誰回羲氏駕眼前安得魯陽戈以此謝塵

世吾將卧煙蘿君能滿飲我高歌白日西飛柰若何

壽圖歌為任栢溪舉人鎧賦

南極星照江之澚瑤彩離離燭萬戶夜半山精作人語
化為白鹿來玄圃聖人御天覆下土黃河清後芝生廡
朝有賢良野無虎四海壽康歌舜禹誤落塵網冒簪組
忽見仙翁淚墮兩任君翩翩顏亦苦巨鼇釣罷遊寰宇
蚤立功勳報明主與爾騎鹿崑崙去

貧女行和呂山人

生長蓬門人不識四幅苧裙手自織髻邊祇以荆為釵
篋內渾無帛一尺行年三十猶未嫁專與人家作針刺
羸將升斗奉阿母春日秋夜閒不得東隣有女富何如
箱常盈千輛盈百鏡裏方及二八年春中已適金張宅
世人重色總堪嗟况重高門不論色高門自富吾自貧
肯以羅綺改貞德猶勝棄婦死路傍冤魂入土血為碧

題潘母節義卷

我今行年八十二猶向人間問奇事舍弟都門寄書來

盛稱潘母之節義潘母早歲失所天即誦栢舟以自誓
區區一死諒非難祇為懷中有弱嗣可轉羞為山下石
不動真如井中水自古閨閣有丈夫潘母訓子乃相似
每憂世上起風塵使學孫吳萬人藝阿子談兵已著名
因念所天忽長逝屢經當路表其門遂使賢聲滿帝里
南北干戈苦未休欲樹勲名此其際潘生臨危莫愛身
以體慈母三遷意汝家舊在渤海隅漢島秦臺相對峙
母為節婦子忠臣為我齊人一吐氣

存家詩稿卷四

欽定四庫全書

存家詩稿卷五

明 楊巍 撰

七言律

雪夜晉邸賞紅梅和孟衛源方伯韻

王家仙苑倚雲開
雪暖山城初放梅
授簡正逢佳客會
移燈若遣美人來
亭欄絳霧翻歌袖
盆盎香風入酒杯
最美襄陽詩句好
瓊瑤欲和愧非才

送張華巖入賀兼憶舊遊

征蓋天邊望去塵東華八月是長春呼嵩遙想千官處
戀闕空慚萬里身海內靈芝隨地貢懷中寶鑑定誰陳
因君回首雲霄上鳴珮如今幾故人

楊彬菴憲副因梁鳴泉憲長卜居真定作此贈
之

一官十載尚飄蓬買宅新來沱水東價值半從朋輩借
生涯豈得世人同藏書山鑿幾千窟種藥園開二百弓

我住滄洲路不遠他年訪爾與梁鴻

送晉左史馮公聞訃還海豐次韻

思親去國復離居一夕憐君髣髴髮疎幾日春山驅匹馬
十年梁苑憶長裾文章已喜留西邸機杼應悲見舊廬
讀罷白華多少淚海邊人仰孝泉魚

遊雙山寺

絕頂誰開古佛堂青山白日塞門傍僧因禦敵不持戒
客為尋詩到上方礪水遠含天色碧春花徧發石頭香

坐談未了西來意下界征人報夕陽

訓紀山迎春日雪見惠之作

青幡夾路晉城隈淑氣輕浮竹葉盃世道應從新歲轉
客懷共向好時開隔牆梅柳雲仍凍入座笙歌晚未迴
不是詞人高宴會如何白雪滿春臺

古龍王廟

一間古廟向黃昏四壁空瞻土像存未見歲時供伏臘
猶聞雷雨覆鄉村沙痕風積香花地藥蔓秋懸霹靂門

漫說精靈能變化眼前搖落不堪論

北樓道中次前溪韻

寒花夾路向邊城雲裏樓臺粉堞明到處長看霜樹色
無時不聽野泉聲松間石鼠衝人散雨後山雞繞磧鳴
最喜秋來烽火少題詩終日只閒行

晉祠次程古川韻

春到石橋客漫過躊躇晉國舊山河桐珪尚瑣叔虞廟
碧玉新傳李白歌地接仙源瑤草長天連朔塞暮雲多

當年霸業今何在
滿目烟霞帶薜蘿

再遊雙山寺

峯前峰後匝烟蘿
再到渾疑隔世過
野水近增秋磬響
山雲長傍寺門多
每逢勝地心偏愜
自歎浮生鬢已皤
欲共老僧修淨業
風塵猶未息干戈

冷泉寺

小亭曲檻石泉幽
古壁苔花偈半留
何代金銀開上界
常時松柏似深秋
娟娟汾月寒搖磬
細細霍雲晚抱樓

此地最宜消渴病人間炎海不勝愁

送唐新洲大叅轉閩中總憲

禹偁
掌科

才名此日孰如君瑣闥曾窺獻納文
海內風塵難見面
眼中芳草又離羣
星槎夜下螺江樹
玉節寒開烏石雲
聞道仲欽棠蔭在八閩刑錯是竒勲

春夜再餞文岡憲長即席次韵

清夜仍瞻冠蓋來
天涯去住各銜盃
乾坤愧我終無補
綱紀須君一振頰
別路山城殘月滿
到時棠樹幾花開

秦川華嶽應增重，舊是梁園作賦才。

春日病目柬羣公

病眼經旬不出衙，全無詩句答芳華。
垂簾漫道窺丹鼎，看字渾如隔絳紗。
世事愁來翻斷酒，人情閱盡尚疑蛇。
柳條梅蕊春俱好，何日從君向水涯。

答呂潭西憲長惠人日詩次韻

羞將短髻入華年，留滯天涯更可憐。
海上玉樓空窈窕，山中瑤草漸嬋娟。
陰雲此日仍愁客，雨雪經冬祇醉眠。

自揣終非漢庭吏黃梁今悟呂公玄

送程大叅入賀

程舊侍
御史

仙槎北上幾時還帝闕高懸霄漢間黃帕共瞻新使節
皂囊猶記舊朝班天開閭闔箕星曉日近蓬萊紫氣殷
遙想彤墀嵩祝後將因獻納對龍顏

沙澗驛逢劉叅戎

風塵滿目塞門間愧我書生鬢欲斑為問干戈何日定
不知江海幾人還河聲暮逸沙邊驛雪色晴看天外山

全仗將軍能破敵，莫令匹馬近三關。

過冷泉關次韻

關門落木忽驚秋，此地防邊控上游。
為憶當年誰設險，轉憐今日事堪愁。
雲生霍巘高低見，雨漲汾河深淺流。
何處角聲聽不盡，趙城城外夕陽樓。

送葛雙石兵憲轉江西大叅

旌旗遙指豫章城，楚水吳山幾日程。
塞上勛名堪勒石，客中離別若為情。
路經匡阜雙螺碧，舟入潯陽一鏡平。

見說東南民力盡應將撫字慰蒼生

秋日同谷司馬遊西河

風烟搖落九河秋我輩携觴豈浪遊
欲向古今窮故道還從天地乞滄洲
沙鳧暮有千羣起霜葉晴看兩岫浮
縱使乘槎上銀漢何如此處老漁舟

秋日登無棣古城呈谷司馬

草色蕭然遍野城高秋登眺雍門情
丘墟那復論前代變幻真堪笑此生
魏豹墳邊四履盡淮陰壘外九河平

古今俯仰元超忽底事猶耽世上名

初至海上時有倭警

一氣混茫白晝陰不知大塊有高深潮酣真懼初來客
歲暮空懷遠望心日隱蠻墟將萬里烟生蜃島忽千尋
于今聖主當中國海若天吳莫浪侵

登馬谷山

平地突然出一峯登臨若立碧芙蓉盤河水繞疑奔馬
古洞雲深見蟄龍影落滄溟高氣象路經葭葦少行踪

老僧已許巖頭住為我先栽萬箇松

先大夫曾署大沽河過此有感

偶過先子曾遊處觸物逢人倍感傷
每訝滄桑誰變改翻悲天地有存亡
當年漁父猶知德舊日官衙不見墻
向晚潮聲和淚落寒煙帶日色蒼蒼

聞蟬有感

上谷雲
中無蟬

陰陰夏木滿西軒蟬響初聞是故園
幸得秋風時向晚恰當雨霽噪逾繁
門前不改烟霞色枝上如聞道德言

回首十年關塞外夕陽惟有鼓鼙喧

次第和海洲翁韵效放翁體

有引

海洲王翁吾黨君子人也年老不廢吟咏與子

倡和得詩最多姑存十首以重其人

日高猶未整襟裾正是莊周夢蝶餘扣戶俄傳七字律
得君勝讀幾年書王門每羨懸車早帝闕深慙啓事疎
從此相將愚谷隱浮名浮利不關予

翁以長史告歸

隔戶松風清到裾詩來又是夢魂餘重聞山水琴中調

更見龍蛇簡上書敢謂此心隨地得祇因多病與人疎
平生獨愛王猷興踏雪還能一訪予

歸來烟霧滿衣裾回首乾坤一笑餘酒熟燈前留客醉
詩成花下教兒書當門但有青山在覽鏡何妨白髮疎
自信狂夫狂更好因君潦倒總忘予

千古功名笑絕裾豈知身外盡贏餘百年長祝慈親壽
一世不通宰相書雪後潘輿肩亦穩風前菜綵舞寧疎
細思子職那能盡願把周行數示予

誰遣秋風吹素裾
天教酷暑盡無餘
海鄉省憶鱸魚膾
歲事堪從大有書
自覺病懷纔脫洒
更聞法網漸稀疏
與君共醉太平酒
街上羣兒任笑予

平時感慨欲沾裾
況見前朝戰伐餘
間道空留廣武墓
危城猶壯魯連書
愁來翻與酒杯好
老去更於劍術疎
莫向古今頻墮淚
安期海上久招呼

草色西園綠映裾
雨晴小閣景偏餘
窮如阮籍仍耽酒
愁過虞卿懶著書
向日鳥聲何歷亂
繞亭竹影自扶疎

靜中忽得高人詠世事無能可到予

相逢野老淚沾裾久旱人貧豈有餘
百里祇存懸磬室
三春不見問農書溝塍水涸因風盡
草木枝焦向日疎
惟願皇天念民命江湖無力枉愁予

老來無力曳長裾卧病滄江廿載餘
馬上豈能為顧盼
燈前長自檢方書乾坤萬事終難了
農圃一生未足疎
春到舞雩心尚在預呼童冠詠隨予

幾年江海接華裾所吐珠璣總緒餘
黃葉翩翩都是景

別才落落不關書歸來方見宦情薄晚節仍嫌詩律疎
漫道枯腸搜已盡東坡佳句趙陳予

秋日同程張二丈登太原西城樓得天字

樓高秋色倍堪憐共倚危欄夕照邊幾處河山征戰後
百年懷抱酒尊前瀟瀟木落汾西地黯黯雲愁冀北天
此日吾儕同眺望吟成梁甫各悽然

題先大夫所遺萬竿烟雨障子

依山傍水總相宜不說南朝李畫師貧也家遺惟此物

痛哉親去已多時堂空似覺烟雲合夜靜猶聞風雨悲
滿幅瀟然雙淚洒可能更誦蓼莪詩

答客問長生

早從勾漏覓真玄絕粒餐霞亦枉然幾被丹書將我誤
實無口訣為君傳流年漸老空慙鏡滄海何時更作田
元運自長人自促不如醉卧白雲邊

贈董先祿雙壽七十

海鶴丰姿衆不如況偕萊婦古稀初窓中機杼還能理

燈下詩篇每自書為厭風塵長閉戶因憐水竹早懸車
即今顏鬢俱無改遐算應過百袞餘

九日登馬谷山

登高此日亦竒哉野色瀟然渤海隈獨喜寒花開絕頂
寧須戲馬向層臺浮雲萬里天難問落木三秋鴈正來
何事牛山不痛飲沾衣徒使後人哀

冬月苗汝材自晉中以氊衣巾見贈詩以謝之
雪天草閣自優游仍擬張衡古四愁裘帽兩函分海縣

故人千里憶并州興來剡水尋詩客囊盡長安當酒樓
繾綣已知君意在愧無錦繡段相酬

送高少尹還章丘時雪中過訪

一官棄去若鴻毛千首詩成興獨豪此日逢迎真倒屣
十年書札憶神交酒盃共把嶺園雪世事回驚渤海濤
別後山中堪自愛女郎峯頂暮雲高

秋日用韻酬劉廣文

劉燕人
喜談兵

秋風騎馬過雲林共有平生著作淫潦倒我堪多病後

蕭條君柰一種深閉門索句饒佳興罷酒論兵見壯心
出處無憑正愁思可能裁和郢中音

送許廣文還易州兼寄張北岡萬育吾

堪悲吾道已蹉跎回首燕山限九河海上人思安定學
客中誰聽漸離歌關門此日風塵少易水長年雨雪多
若見兩豪憑問訊談兵壯志復如何

寄贈王潁州

為政風流世所無一時聲價滿留都寨帷夜動長淮月

省稼秋過十里湖楚地有人歌
召杜漢家從郡起公孤
他年南國懷恩澤定向甘棠詠大夫

古城看獵因至黃龍渚

古城城畔斷蓬飛日壓平原正合圍
才短豈能為獵賦
年衰猶未息兵機即看滿目寒雲起
忽憶邊頭羽騎歸
欲把雄心弔前代秋風吹上釣魚磯

秋日飲一齋叔北村二首

阮家別墅喜初遊為黍烹雞八月秋
稼穡有年供國稅

江湖何地不風流，繞村樹色紛如錦。
傍海雲生突似樓，從此往來須盡醉。
門前峻嶺是糟丘。

從來發興自林泉，此日開尊地更偏。
三洞煙雲秋水底，九河雷雨夕陽邊。
因催詩句狂逾甚，為愛君家酒亦賢。
不怕夜歸逢醉尉，看參應待欲橫天。

送莫廣文署縣後還鄒平

橫經濟北自何年，暫視銅符渤海邊。
才大豈愁淹簿領，興多隨處見詩篇。
盤河水落疑恩澤，大峪峯高憶講筵。

別後未須勞翰札賢聲雅有口碑傳

送王廣文宗之使京回還寧海其弟正之皆有

文名用前韵

君家兄弟玉為林怪爾官卑且滯淫奉使虛隨天闕轉
談經復向海門深幸逢漢代崇儒日不比秦皇策石心
賦就凌雲人所羨豈無狗監是知音

送田廣文之鄒平府教授

偃蹇儒官誰更過談經空說似田何讀來萬卷猶為少

金八ノ一
卷五
攜去片氈亦是多泗水春風餘潤澤尼山夜月尚嵯峨
賈生也作長沙傳千古還知道不磨

還家後春日南園

春風昨夜滿閒居藹藹青回徑草初纔買園田思甃井
欲招隱士旋為廬姓名已謝山公啟農圃頻看王氏書
莫道還家無客訪門前日日見樵漁

答客問亦山園次韻

投老山城晝掩門空齋祇有藥爐存風塵力倦十年路

松菊貧開半畝園，
謬許襟期過阮籍。
那知骨相似，
虞翻肯乘詩興，
閒來往願借南鄰酒一樽。

題滄洲卷送張子還越中

露冷滄江客欲回，
囊空人共惜高才。
家居東海經年別，
舟問南徐幾月開。
秋草獨過伯禹墓，
寒雲愁上越王臺。
不知陸賈遊歸日，
曾有羣公詩卷來。

望崆峒山

鼎湖龍去幾千載，
聞說軒轅尚有祠。
春草應荒問道處，

曉烟猶似煉丹時誰登絕巘尋玄鶴我夢陰崖採紫芝
若使長生真可得山中早拜廣成師

秋日登徐州延雲樓

樓壓秋城半入雲憑高四望楚天分尊前木送千山色
檻外鴻飛大澤羣事去霸圖俱落莫怪來仙氣尚氤氳
最憐西北長安遠白首回時憶聖君

過定山莊先生故里效其體得詩一首

此老平生鐵作腸詩篇每帶梅花香欲知出處惟漁父

自信羸豪過楚狂
江海高風元滾滾
乾坤正氣尚堂堂
至今人道墳頭上
松栢經年有雪霜

平定元宵無月

客中節序意多違
寥落山城燈火稀
尊酒閉門愁黯黯
星橋何處雪霏霏
誰堪老病逢今夕
況復風煙接帝畿
時事鄉心兩無賴
夜深獨坐一沾衣

送李闕恭司訓藁城與槐南正菴相近

文成倚馬幾人看
老作中山學校官
但繼弓裘三世業

寧辭風雨一羶寒西堂可遂聯床約縮地應追益友歡
莫向塵埃羨炎熱折腰為吏古來難

時議師生
不跪路

送董三同獻春秋補傳不遇還越中

嗟君萬里謁楓宸又向江湖老此身補傳抱來空泣玉
新詩賦罷浪驚人愁中南國干戈在雪裏長淮道路貧
薦士未如楊得意綈袍雖贈亦沾巾

壽太宰虞坡楊公

周家師保漢尚書翊贊三朝白髮初曳履更趨金闕早

掄才長到夜窻虛殿中
聖主流清盼海外
夷人問起居
自岳降申天意在
古來壽者定無如

送任計部之廣川

別我仍留書一函
分司何在廣川南
才掄粉署應非偶
恩向明時已再銜
滿地九河多禹跡
開軒萬里盡吳帆
看君到處無言意
事業終當擬畢誠

送趙郎中之任保寧

訥能詩

自古閩中賢太守
其間強半有詩名
以君起草明光殿

遂爾分符大獲城秦代金牛開驛路巴童竹馬候行旌
治平十詠應先和涪水皆添白雪聲

送董司訓茂卿之任高平大父曾為邑令有生

祠

一羶西入太行雲把酒都城此送君每向塵埃悲吏役
却因庠序羨人文門臨上黨千峰繞馬過浮橋二水分
大父昔年曾作宰祠堂香火正氤氳

宿懷安讀王憲副壁間有懷詩次韻

新句壁間讀罷驚詩家君亦是長城吟隨鼓角聲俱壯
思入星河影倍清憤世曾聞捫虱語經秋復見憶鱸情
此時安得一攜手把酒關山醉月明

有感

一官白首滯邊城樗散渾多江海情嗜酒那知囊裏盡
尋僧數向寺中行兵塵滿眼全無策吏隱何心浪得名
揚子十年猶未調閉門空草太玄成

寄送曹學憲之任江西叅政

明時薇省重詞臣南望章江輿轉新天上彩雲隨去鷁
域中廬嶽待高人滕王閣敞千峯曉徐孺亭孤萬木春
獨恨支離荒塞北未知何日挹清塵

秋日同孫參戎登陽和城樓

清秋白日映山川遠景平臨古塞前自得將軍無戰鬪
不妨客子有詩篇霜凝錦繡灘中樹風落琮琤石上泉
莫向燕南頻極目故園迢遞海雲邊

陽和有
錦繡灘

憩懷來仰止亭次趙中丞韻

邊城寥落戰塵餘直北猶傳箭上書那有勛名馳異域
每因花鳥憶閒居桑乾水遶重關外仄嶺山青六月初
未必此時少頗牧白頭安用魯中儒

酬劉二府過嶺園劉宣府人有高才以非科甲
故有末句

老喜故人海上過開尊嶺園對煙蘿纔聞朔塞兵初罷
豈料中原事漸多語到蒼生流涕淚愁臨岐路邈山河
眼前君最强吾意國士寧須甲乙科

春日行廣靈山中

層巒曲徑興無窮，碧草晴吹三月風。
怪聽禽聲幽樹裏，清憐詩句亂山中。
隔林烟起和雲黑，繞磴花開映水紅。
日暮不知是闕塞，猶將歸路問樵翁。

宴集惠安伯宅呈省中舊僚

早從諸彥侍明光，此日重登世爵堂。
白髮尚堪陪讌飲，清時誰不羨鸞行。
門前柳暉春城色，座上花分御苑香。
欣遇聖朝容獻納，共將堯舜事吾皇。

送王太僕之任滁州

之垣舊掌科

出入三朝瑣闥中，承恩今借歷湖東。
論官亦是王毛仲，抗疏猶傳魏鄭公。
山色青圍衙舍滿，泉聲亂落古今同。
使君自有無疆意，肯向溪亭學醉翁。

壽河南李封君其子任通政曾使琉球

有子今為門下省，羨公猶是黑頭時。
鶴姿已卜仙人壽，鸞誥新蒙聖主知。
家近函關多紫氣，地連嵩嶽長靈芝。
曾觀奉使琉球錄，天報忠臣良在茲。

通政名際春

九日京城西和汪山人韻

京國城西幾度秋若非高士共誰遊
千家樓閣隨登眺一片湖山費應酬
風雨乍晴天有意煙塵不動客堪留

樽前忽誦黃花句應是珊瑚入釣鈎

詩話有珊瑚鈎原倡月一鈎

夏日飲途次小山中用韻

山開屏障樹為籬座上烟雲墮酒卮
鳥愛重陰啼不歇詩逢佳境句多禪
夢魂渺渺江湖遠心事悠悠道路知
避暑且圖河朔醉吏人漫報夕陽時

贈王汝遵

忠簡公
後能醫

多君早歲厭簪纓，獨跨青驄海上行。
見說移家來馬谷，復聞訪道入蓬瀛。
逢人怕問尚書裔，賣藥還留宰相名。
不為老夫今抱病，城中誰得見先生。

戲呈王司寇李少司徒二詩豪

兩賢真是阨人哉，搜盡枯腸詩又來。
笑我已輸三舍地，推君並上百尋臺。
清新如此能無法，敏捷應知別有才。
暫乞騷壇罷旗鼓，燕山春到萬花開。

和王司徒元旦早朝之作

身事清朝已歷三
羨君華髮尚宜簪
星回萬里天將曙
燎映千門路更諳
虎拜轉從新歲健
龍顏長並上公參
應陳國計匡明主
出入休言力不堪

讀騶山諸公所遺倡和詩有感次韻

世間何物不成塵
惟有詩文重漢秦
偶誦賡吟如晤語
因思朋好欲沾巾
乾坤老去誰長在
江海人高半是貧
恨不當年同結社
鶯花共醉百年春

誕日寓普明寺謁毘盧佛

虛度八旬又一年茲晨孤矢憶初懸四方空抱風雲志
千里仍多山水緣數問蓬萊無道路翻令老稚訝神仙
永懷慈母恩難報白首焚香古佛前

誕日寓迴河寺兼贈慧上人

回頭身世歎塵埋古寺暝投濟水涯乍入山門疑舊到
纔逢老衲意相諧慚予年過北溟望羨汝法宗南嶽懷
初度客中念慈母佛前願施八闕齋

遊靈巖寺

八十二翁長閉關為尋知己到名山巖頭雲走如迎客
谷口花開似解顏鐘磬聲來天地外樓臺色入有無間
老僧欲我留詩句松月滿空鶴未還

和呂山人夏日集嶺園遇高生韵

綠樹陰濃覆短籬相逢正是夏深時種瓜不負青門約
對酒仍歌白苧詞燕掠紛紛來近渚蟬鳴箇箇向高枝
天邊忽報夕陽盡為遇漁樵歸去遲

贈董氏四兄弟

商山洛社映千春，猶是東西南北人。
那得同胞俱白首，況能高蹈遠紅塵。
鶴聲斷續秋原靜，棠樹發生夜雨頻。
我亦龍鍾兩兄弟，可容作會海之濱。

題劉廣文墨竹

千載俄逢此墨君，茅齋頓覺起秋雲。
靜憐疎影時相對，遙憶清風晚未聞。
高節不隨天地老，淡烟曾與蕙蘭羣。
伊誰攜向西窓坐，惟有能詩鄭廣文。

贈鄭于石

于石諱國望越之高士也至日冒雪訪予詩以
贈之

草屋雪天自擁衾忽逢至日動孤吟即今門徑人踪絕
何處梅花月影深剡水尚思迴夜棹燕山猶記滿朝簪
君來正是閉關夕共我圍爐坐竹林

走筆和王同野韻

明時誰復問漁磯贏得經春晝掩扉祇為小山叢桂在

況逢浮世與心違
天邊夢斷雲霄侶
堦下恩深鳥雀饑
聞說年來能悟道
餐霞不採首陽薇

王少尹祈雨有應

四月荒田苦未耕
誰從窮海問蒼生
祇因少尹心如水
遂有甘霖夜滿城
堪笑陰陽虛縱閉
豈知天地自和平
請君明日南郊望
徧野農歌雜頌聲

贈孟仲傳

聲名早已動三臺
河朔風流自異才
講道忽驚兼孔墨

論交不說似陳雷百年湖海占星聚五月葵榴對酒開
別後思君何處切暮雲春樹隔蓬萊

悲性聰和尚

每坐更深香自焚行年八十斷聲聞已知陰魄隨風盡
何處法身逐化分瀝水有羅仍挂壁鄉人結社競參墳
禪家寂滅休垂淚為買碑刊大鑒文

存家詩稿卷五

欽定四庫全書

集部

存家詩稿卷

六至八

詳校官監察御史臣徐如澍

侍讀臣孫球覆勘

總校官編修臣王燕緒

校對官學正臣常循

謄錄監生臣鄧以伊

欽定四庫全書

存家詩稿卷六

明 楊巍 撰

五言絕

附六言

丁字沽

可怪直沽水翻為丁字流扁舟何處去風起浪悠悠

桃花口

泊舟桃花口不見桃花樹惟有捕魚人日暮放歌去

載酒亭四絕為紀山賦

山雲浮雪舫溪月上花臺
竒字主人識誰能載酒來
裊裊孤雲入嚶嚶雙鳥鳴
詩成留客醉棊罷遶花行
琴尊虛檻裏獨坐有高人
月映桐花夕風歸柳葉春
每到花開日攜觴坐此亭
醉來拚一笑不為訪玄經

孤山獨秀

在蔚州

誰將一片石高插向晴昊
留與路人看天風吹不倒

塞上謠

年年築邊城敵騎猶出沒夜深沙月寒空照杞梁骨

擬古思邊二首

久戍在邊頭春來忽已秋鴈傳天外信人倚夢中樓
自是良家子十年九在邊鬢毛白已盡何日勒燕然

獨坐

夙心厭煩擾無事即羲皇山入曉窓碧風吹午院涼

生老病死佛家以為四苦宋人又借此以誚權

貴今反之為四絕句焉

無慮復何私人皆孩視之一啼並一笑猶似未生時
甫看血氣衰百事一無為白髮茅簷下從教日晷移
南北罷驅馳閉門高卧時不生又不滅惟有達摩知
歸去是便宜蒙莊憤世詞人生如晝夜此理不須推

秋園雜興

晚歲習禪寂已無世上情如何深夜裏猶自感秋聲
天心元不動寒暑自推移獨愛陶家酒絕無宋玉悲
高林葉亦落何況於蒿萊怪爾嶺頭菊迎霜尚未開

今年大雨水家住九河邊不慮貧無食翻思買釣船
榮枯觀物理萬事總如斯無慮復何遣惟吟靖節詩
為問南歸鴈徘徊戀稻梁寒雲幾千里何日到江鄉
種麥此時節閱耕原上田衰年筋力少惟執打牛鞭
結草為廬舍人稱安樂窩秋風滿天地將柰此中何
向晚蛩聲雜淒淒籬落邊老夫方醉卧魂夢繞鈞天
一年惟此月清比高人心獨坐小樓望不知興淺深
不見安期棗已無邵氏瓜嶺桃纔半熟氣味逼仙家

猶是仲秋月菊花尚未然故人念狂客先送酒家錢

時李

尚書戴
送酒價

偶題漁樵圖各一首示知己者

終日江頭坐臨流非羨魚狂瀾嗟未倒愁思竟何如
不斷終南路難辭金馬門去留兩未得俯仰愧乾坤

宿凌雲寺二絕句

繫馬夕陽邊山僧訝客至門開古殿秋云是凌雲寺
野寺一僧住朔風萬里來敵營猶未徙獵火照邊臺

郊居

秋苔青遍野寂寞愜郊居何處山僧至門前響木魚

春日南墅讌集

南郭春偏好留人到夕陽風吹山鳥語花落酒盃香

客中

到處悲新事連宵夢故林鬢毛誰願白無奈客中心

遊善卷洞

五月吾來此洞中涼似秋問僧搨石刻攜去記曾遊

聞王柳濱謫楚中二首

尚學庚戌兵變

聞近長沙地應悲屈賈魂莫言謫戍苦不死是君恩
一自潞河別幾看秋草生哭君無限淚不是世人情

讀莊子

富貴浮雲爾死生一夢焉此中誰解得空誦遠遊篇

偶題

正是小春天欲眠不得眠方為詩思苦又辦酒家錢

丁卯橋

愧我塵埃客兩過
丁卯橋徘徊醉吟
處碧樹自蕭蕭

宿穆陵關次壁間韻

一路入千山行人日不閒
那堪霜月白獨宿穆陵關

獨坐

亭空寒落葉野近暮多雲
何處鳴孤鶴坐中悵獨聞

過存上人墓

路左孤墳在何方
示化身惟留橋上月
長渡往來人

題空塵畫

不聽松風起山窓生暮寒惟愁天地老留此畫圖看
認和尚號一菴詩以代偈

未認猶為二既認一亦無一無兩不得何處著工夫
偏闕北望

耕牧春仍廢臺隍敵作隣受降城不遠恢復是何人
京衢謠

風寒僵馬足雪厚沒車輪可怪九衢內猶多來往人
閏旱二首萬歷庚子作

一早忽四年天心忍若此居鄉無片長自愧何窮已
溝壑不忍視一視淚如雨憑誰請發棠空飽倉中鼠
敏上人坐禪詩以嘲之

真僧亦在市大道不歸山為問敏和尚如何學閉關
寂照原無二休從寂一邊宗門曾有語作鏡不磨甄
嘲儒

尼父不言靜後儒何怪哉紛紛諸語錄皆自五燈來

六言

遣興

時寓
栢井

病卧獨親藥裏詩成不負年華汨汨門前流水青青山

上人家

夢繞床頭詩卷榻依洞口烟蘿誰遣村童送酒忽聽野
鳥如歌

存家詩稿卷六

欽定四庫全書

存家詩稿卷七

明 楊巍 撰

七言絕

壽董憲長七十

去國竟難明
蒼莖一官元
是為丹砂要
知天地酬君意
七十誰能鬢未華

題舍弟二川卷

惠連此地掩郊扉為愛隣家盡釣磯
況是滄江秋色好
隔原頻見鵲鴿飛

秋日送華空塵還章丘

高秋紅葉映柴闌幾夜論詩盃酒間
別去故園明日是
寒花開徧女郎山

和王兵憲寄秋日詩韻

白日無多其柰秋每逢清夜共誰遊
吟成張翰黃花句
醉上庾家明月樓

世事猶能入夢魂，却因多病乞文園。
向來三輔論兵地，短劍長纓動塞門。

關山北望漫躊躇，聞道單于款塞初。
此日江湖堪自慰，知君不向酒盃踈。

壽劉廣文父九十

劉燕人

只今客傍秦王島，何似家連碣石宮。
自是劉晨仙骨在，百年無地不春風。

才名早動九陵邊，迎養仍開首宿筵。
誰遣黃金收駿馬

空教豪士得長年

東關寺杏花

野寺尋芳日已斜
春風無力挽飛花
不知開落誰為主
欲向山僧問法華

春日東門人李生卧病

柳色青黃二月初
吾徒猶自檢方書
縱然出郭兼攜酒
眼底何人最起予

過雞鳴山憶王少參

下臨諸塞上摩空百丈天橋一徑通可怪兩人俱好事
夜深曾到白雲中

東關寺牡丹

洛陽春色艷難勝金谷于今半葛藤爭似一株山寺裏
夜深猶映佛前燈

贈金相士口號

看君碧眼是仙才誰遣江湖萬里來自笑已成丘壑相
莫言麟閣與雲臺

憶舊

野色蒼茫堤口路故人前日從茲去
天邊消息幾時來
繫馬愁看楊柳樹

聽黃鸝

寓都門作

春城何處轉黃鸝
纔聽忽飛別樹枝
因憶故園最深處
一尊相伴日西時

寄訊紀山

山連巫峽雲為館
花映樓臺玉作人
把酒聽歌明月夜

還聞世上有風塵

憶東霞鍊師二首

知君名在七真中
我亦曾經訪絳宮
不信崑崙丹洞裏
向來燒鍊火猶紅

前日桃花路口分
自言採秀入閒雲
海天漠漠正東望
一鶴飛來疑是君

送陶生還會稽二絕句

問君那忍別吾廬
為憶蘭亭有舊居
塵世變遷難自料

茂林脩竹近何如

九河風色不勝秋
多病憐君上去舟
明歲春時還念我
桃花深處半間樓

送楊小竹兵備昌平

謝傅從容談奕日
終軍慷慨請纓年
風雲陣列沙河上
虎豹旗翻帝寢邊

暮秋醉過陽信諸君子別墅各留絕句以代面

談

黃葉青苔徧四隣
即看秋色亦勝春
此中曾見客來否
明日裁書問主人

右後溪

踪跡三江定五湖
當門空見有丹爐
滿林落日盃還把
應笑高陽舊酒徒

右東沙

門前高柳幾株斜
秋意蕭條到菊花
老興不知過重九
銜盃猶問是陶家

右信溪

辟疆亭館傍城阿
明月秋深帶薜蘿
見說時人多載酒
却令狂客夢中過

右北山

過舊遊

十年前向此中遊
尊酒傳呼夜未休
何事春風不相待
垂楊搖落水邊樓

五嶽各賦一絕

玄嶽去天尺五遙
陰崖長夏雪難消
聚仙亭上誰能住
萬壑松風起夜濤

七十二君封禪處
桃花谷口幾殘碑
獨傳李白詩魂在
海日長看夜半時

衡嶽南來江漢分，赤霞深護祝融君。
芙蓉石上幾時到，一夜心飛七澤雲。

太華峯堯第一峯，陳搏仙後有遺踪。
何年去訪高眠處，萬里青天跨白龍。

少室峯頭跡未陳，騎羊仙者是吾身。
自從玉女窻前別，落魄塵寰五十春。

雪夜宿避風塵處，夢夫人陳氏意極悲酸，隱括其語為二絕句。時萬曆乙未仲冬十六日也。

風響寒林夜雪深
此來見我九泉心
別君更有千行淚
明日看時血滿襟

自別毘陵隔死生
白頭未遂豈忘情
當年四鼓讀書夜
記得南隣碾子聲

遊王母宮四首

周朝八駿去不返
此地猶傳王母宮
昔日瑤池作湮水
仙人元在有無中

草色泉聲向晚多
故宮猶嵌碧山阿
門前颯颯松風起

似聽當年黃竹歌

青鳥已無白鳥來
漢皇空築集靈臺
祇因王母曾臨處
一樹山桃對客開

曼倩空為洞冥記
四山半屬野人家
長生自古誰能得
惟有蒼松管歲華

為任栢溪題畫二首

箕踞科頭烟霧間
百年生計是青山
陶詩和罷無人見
落日蒼松一鶴還

萬壑縈迴一草亭溪雲漠漠山青青主人何處尋芝朮
留得松聲與客聽

贈諸豪寺中觀水二絕句

矮矮山門向渚開小橋斷岸傍經臺此中誰動觀濠興
遙想慈航送酒來

野水僧家併作秋把盃此地亦竒遊狂歌恐有蛟龍起
一夜驚濤濺佛樓

和呂二山人病酒口號

好奇空自笑揚雄
海上俄來呂爾東
卧病吟詩頭共白
閉門三日雨聲中

太原寒食和紀山韻二首

寒食客中只醉眠
不知何處杏花天
鴈門此日猶烽火
却向綿山獨禁煙

山城亦自有遊人
柳色千條汾水濱
見說漢宮新賜火
况聞楚客唱陽春

静海逢炒米店舊主人
甲辰下第曾飯其家

蕭條野店大河濱三十年前舊主人今日相逢無限意
一裘猶記苦風塵

揚州

吳山楚水古揚州人競繁華客獨愁二十四橋橋上望
堤邊楊柳寺邊樓

堯陵

寒雲漠漠樹蒼蒼晉國山河幾夕陽獨有荒陵平水上
行人猶解拜陶唐

衰年苦寒暑賴此二物相陪戲各為一絕聊以遣懷非歎老也

衰年冬月更愁人不怨天寒怨此身惟爾與予堪共老
脚頭布被暖如春 湯婆子

衰年炎暑體如焚幸有此君為細君紈扇無人揮亦得
一床一簟卧南薰 竹夫人

井陘道中苦暑

道上行人渴欲死病夫其柰此炎蒸相如不得金莖露

杜甫空思玉井冰

炎天又出玉門關
路狹渾如在火間
忽憶滄江長散髮
柳邊石上弄潺湲

題王憲長龍池圖

道行太
原人

君家素業傍河汾
閉戶談經世所聞
不信終當作霖雨
請看池上夜生雲

憶老母用松谿韻

鄉書兩月不曾聞
誰阻天邊鴻鴈羣
遊子那堪遙極目

關門高接太行雲

高堂白髮似絲長
三伏誰生枕簟涼
苦戀微官不歸去
百年心事愧黃香

閱武二首

半是漢兵半酒徒
五陵豪氣莫嫌粗
眼前上馬誇輕捷
腰下斜懸金僕姑

十八男兒六郡雄
一身能挽雙珣弓
銀牌射得不將去
醉卧妖姬酒肆中

焚龍涎香

夜靜香烟入杳冥
草堂猶似帶龍腥
不知何處鳴孤鶴
飛下窓前聽道經

介子推祠

龍蛇寂寞一祠存
濁世誰知處士尊
漫向綿山空墮淚
火能燒骨不燒魂

過野寺憶范霑南憲長

山邊小寺匝烟蘿
秋日曾同范史過
記得一樽相對處

荳花門外雨聲多

過清虛觀憶王僉憲

山頭碧殿倚天開
去歲曾同仙客來
今日獨過詩興少
白雲空繞牡丹臺

題梁中丞卷四首

宣獻平時書已校
不須中秘更燃藜
都門處處春偏好
攜酒看花費馬蹄

吉士

漏轉銅龍夜未殘
即持白簡立朝端
宰臣不喜忠良士

始信言官自古難
給事

榆關西去接輪臺
萬里烟塵晝不開
無限邊情空浪說
惟君親到玉門來
閱邊

三輔賢聲未有涯
春風曾及萬人家
至今父老思恩澤
猶護甘棠一樹花
參政

送文岡詩予有青瑣幾年還入夢
蒼生此日轉多情之句受菴周公許不喫力戲作絕句

閉戶吟詩十幾年
渾無一句向人傳
如何四海周公瑾

獨取驪歌第二聯

挽張狀元元忭

勲名端不負高科白玉樓成柰命何惟有良知心尚在
姚江深處月明多

張大叅前溪遊五臺山寄此二絕句

峨口村南烟嶂開人無同類與誰來不知萬木千山裏
上到文殊第幾臺

靈山到處是花宮秋日登臨憶上公碧澗水喧簫管處

寒巖松落酒盃中

同羅近溪先生夜坐

南州高士神仙侶
一夕相逢世慮無
坐聽玄談清不寐
泠泠霜月貯冰壺

次韻答于谷山宗伯見懷四首

十里烟村一短筇
山僧野叟日相從
疎慵合向此中老
不問蓬萊若箇峯

柴門松徑已新開
舊日求羊亦不來
雙鶴至今猶戀主

早晨放去夕飛迴

南北風塵入夢驚
書生抵掌競談兵
古來豹畧推黃石
却向緱山吹鳳笙

莫理城南汶水船
于今諸塞起狼煙
已知宵旰勞明主
不記仙曹侍從年

再過觀音堂贈老尼

野店南來古佛堂
舊遊回首幾星霜
不知別後叅何法
枯木寒巖帶夕陽

過無棣舊城

曾經此地一悲歌東望營丘西大河惆悵當年曾賜履
茫茫故壘野烟多

遣懷

世上除書不到眼天涯懷抱自開尊平生只有吟詩癖
吏散鴉啼獨閉門

宿岔道村家

在紫荆關北口

亂石為牆籬作門今宵寄宿兩家村聖恩已許歸田去

猶自江湖繞夢魂

延生來謁因善篆畫各贈一絕

纔到邊城氣即靡
高中猶似魯中儒
自言曾習陽水學
百尺狼烟篆得無

受降城在黃河畔
東去山川接大寧
可恨何年陷沙漠
憑君圖寫上明庭

寄平定李給事

名念

短李曾為青瑣郎
詩名諫草擅時芳
逢人首問平安否

高卧冠山白髮長

秋雨宿長安嶺

滿戶烟霞傍戍臺
疎燈獨坐一尊開
夜深怪底不能睡
松栢千山風雨來

村中逢老人二絕句

八十村翁獨倚門
子孫逃盡一身存
自言耕鑿無筋力
朝夕充腸是草根

老人何事欲沾巾
不怨官家賦役頻
手指門前桑棗地

已荒三十四回春

平定李侍御應時予之同年友也曾視予病感
之寄此

前年視我山中病落日獨騎驄馬來記得任家亭子上
連翹花發共銜盃

過環綠窩

以下四首
懷孫刺史

詩魂何處草萋萋環綠窩中路已迷黃鳥不知春寂寞
夕陽猶遶樹頭啼

春日對酒

春來有酒即成醺
記得曾書白練裙
今日花開君不見
一盃誰去瀉孤墳

過王戎店

野店春殘不見花
高林落日亂鳴鴉
同遊詞客已黃土
淚盡當時賣酒家

讀騶山集

楞嚴寺裏論文夜
馬谷山前看獵時
壯志已隨流水去

遺編讀罷不勝思

乙未除夕

自嗟七十九年身
滾滾流光又及春
莫怪更深不肯睡
天明便是八旬人

回頭細數七旬身
白髮燈前更候春
縱使明朝增一歲
依然三世太平人

言者謂余類婺源陽城二公皆高才非余所能
並戲作一絕句

縱呼牛馬也須應況擬當朝二顯人自幸疎慵猶可數
益憑濁酒送殘春

得昌平楊小竹書

雙魚遙寄自昌平別後誰堪春草生記得去年風雪夜
王村寺裏送君行

憶舊有感

丁卯橋西憶舊遊綠楊高映酒家樓故人莫訝凋零盡
一別江南四十秋

春日飲董氏昆仲園

城南十里盡桑麻
春色誰如董奉家
況是白頭兄弟在
移尊偏向紫荊花

夜半有感

土木形骸老更慵
十年耳目已如封
忽然夜半屋生白
聽得城南古寺鐘

新安言懷寄內二首

青春過盡始東還
滾滾紅塵馬首間
明日到家應共惜

菱花相對說愁顏

一年長在別離中歡笑惟應夢裏同
明日相逢還是夢

驅車仍向太行東

時告
不予

和周明府

自分明時老一丘
況逢茂宰更何愁
怪來酒醉西園夜
猶向燈前夢九州

鵬月問村家求杏栽

為農為圃縣城東
絕勝儒家一畝宮
自笑老來仍好事

隔年先問濟南紅

杏樹名

題舊滄州主人壁

自從獻策至懸車
此地經過四紀餘
白首還家成底事
空慙人迓老尚書

題同官孟女祠效胡曾體

烈女山頭還有廟
秦人塞上已無城
經過莫聽漆河水
猶似當年號哭聲

鄉試場屋中作

諸生時

明遠樓頭星斗稀三聲畫角鴈南飛此時父母應相說
共喜兒郎入棘闈

謁武安君廟

嶺過飛狐春不到峯當回鴈雪仍殘獨憐千古防邊處
廟貌森然祀武安

讀長慶集見樂天與盧貞詠楊柳詩作此

名賢麗句詠垂楊為愛柔條拂地長春去柳枯人亦老
爭如松柏晚蒼蒼

戊戌三月東從弟伯鞏

此日桃花恰正開攜壺去賞且徘徊春風應解阿兄意

愁聽哭聲滿路來

時兵荒
民苦甚

留東溪老友

海上兵戈正亂離十家今有九家饑老年朋友如兄弟

好在城中住幾時

題老君堂

在宣府
東路

白雲深鎖老君堂萬栢千松歲月長若有前朝宮觀事

願來此地一焚香

傷杏花

方喜杏花爛漫開
豈禁風雪兩相催
何如松柏嶺頭樹
依舊蒼蒼映綠苔

存家詩稿卷七

欽定四庫全書

存家詩稿卷八

明 楊巍 撰

排賦

過十八盤山

并州愁作客，況復渡桑乾。
去國幾千里，登山十八盤。
兵戈今未息，道路古來難。
落落悲鬢迢迢，愧一官鄉書。
過塞少節序，向花殘海上園。
廬在歸歟賦，考槃

賀馮長史新居

十載遊梁苑秋來始定居
官貧無錦綺屋滿盡圖書
漸喜竹梧長新看鳥鼠除
藥欄風掃後花徑雨晴初
問字人頻往卜隣意已如
依君欲買宅歲晚共樵漁

醉日移竹八韻

曾讀田家譜竹宜醉日栽
新從濟南乞正及此時來
雨好忽連夜風輕不動埃
清音應入戶疎影欲浮苔
逸士攜琴至幽懷對爾開
覓竿防稚子留葉固新醅
詩向溪

邊得人疑淇上回成林如可望甘老白雲隈

贈呂山人六韻

振藻江湖裏聲名到處聞惟知崇隱節不肯慕竒勲
面帶烟霞色身將鸞鶴羣風流郭有道詩韻沈休文投轄
嗟何晚論交意已勤相期攜手去岳頂坐看雲

邊城春日懷歸

烽火連高塞旌旗映晚霞登城看漢壘幾處聽胡笳
瀚海頻傳檄嫖姚始建牙殘春榆柳動入夜鼓鞶搗白首

三年客青山萬里家邊塵何日定歸種故園瓜

弔土木

邊馬南侵日鑿輿北狩辰當年誰護蹕萬乘獨蒙塵社稷憂危極乾坤戰鬪頻運衰憑貴倖事往憶忠臣故壘青山繞平蕪白骨新天陰啼鬼處猶自感行人

倖指振忠指肅

愍

聞陸太宰南還六韻

還家三載久回首五雲深自笑波仍起如何陸亦沉毀

譽不在我寵辱豈驚心遠水迴孤棹空齋橫素琴安危
責有係衰病任相侵好向山中卧寧為澤畔吟

奉命祭霍山六韻

祀事存虞典山名載禮經汾河真若帶嵩嶽即維屏候
氣雲長紫凌寒樹亦青根蟠乾艮地戶墮井參星縹緲
聞天樂陰森肅夜靈吾皇勤秩望晉土借安寧

題明宗真儒卷六韻

溯系唐堯後分茅太岳東貴無叔世態雅有哲王風翰

墨龍文統笙竽鳳曲同談詩宗漢魏講道入鴻濛地近
蓬萊閣客迎碣石宮願言翊聖主天祿共無窮

弔白骨賦

踰常山而北下眺雲中之層城何寒風之颯沓聽野鳥
之悲鳴慘黃雲之黯淡盡白骨之縱橫為叢蔓之所纏
為砂礫之所撐經霜露以幾歲無抔土之可塋吁嗟乎
爾為何方之人廼斃於遐裔或築城而不還或逆旅而
嬰疾或敵騎烏合旌旗蔽日主客勢懸衆寡莫敵金鼓


不鳴貂錦盡失挺身而鬪死於鋒鏑此皆并州之健兒
上谷之豪卒委骸骹於沙場無功名於石室若夫陰雨
零零塞草淒淒飛鳶垂翼牧馬頻嘶又若腥風振北昂
宿臨西狐狸競嗥鼯鼯亂啼蘆笳嗚咽烽火淒迷岩門
已閉山高月低骨參錯而無主魂漂渺以何栖將軍已
佩夫鵠印佳人猶夢於香閨徒聞野鬼向風而泣血行
人駐馬以興悽粵柳州之掩骸暨新建之瘞旅誦遺聲
以若割淚滂沱而如雨使見紛然於山谷又不知其焉

處慨干戈以日興懷大道而莫覩吁嗟乎西伯之掩骨
不若堯階之舞羽

滹沱源賦

俯源泉之一畝兮極末流以千里載涓涓以若蒙兮終
浩浩而如駛環晉趙以濟泮兮歷晝夜而不止由秦戲
以沂靈兮映臺山之嵯峩經聖阜之百仞兮會沙濊之
兩河遵蕪萋而東下兮與滄瀛而同波聿滔滔之遠勢
兮胡為起於細縷曰發之有本兮為前哲之所與故無

遠之弗致兮涵萬物以吞吐蛟龍蟠於其內兮興塞上
之雲雨嗟滌洄於孤山兮向秋露與春蕪胡不北流桑
乾兮限敵騎之長驅又不南入淮泗兮轉香稻於東吳
徒汨汨於朔野兮為行人之所吁



存家詩稿卷八

存家詩稿跋

余自幼習舉子業不知為詩至嘉靖乙卯外補晉臬時督學使者為曹君紀山始提挈余為詩謂以唐人為宗且辨其體格余不甚解及余歸田有四明呂山人者往來海上相與倡和共明此道聽其所談亦不甚解平生得詩總之不下千篇門人李生善楷書因命收掌及余宦京師李生病故此物亦隨化去子姪輩復隨處抄錄無論歲月朝野得詩六百餘篇亦多矣乃就正於臨邑

邢侍御知吾為更數處加之評品今年舍弟岑以公事
寓維揚將此稿再就正於雲夢鄒君大澤鄒君舊銓部
郎與余有共事之雅改竄逾多又序之乃加災於木夫
唐之詩人抉胃嘔心終身焉方傳於世余疎散人也况
習禪寂不好苦思此物徒資後人談笑耳顧倡之者曹
君紀山也共藝者呂山人甬東也改竄且序之者邢君
知吾鄒君大澤也筆跡猶新未敢遽棄乃書諸後存於
家以示吾子孫焉客見之問曰公登仕籍五十年刻中

不及勲名何也余笑而不答又問曰陳思王謂後世誰
知竄吾文者公顧歸美於紀山諸君何也余亦笑而不
答萬歷壬寅仲冬夢山翁書於藜菟居中時年八十有

六

紀山名忤 山人名時臣

知吾名伺 大澤名觀光

